

田川

井川

井川

井川

又

手撚香牋憶小蓮欲將遺恨倩誰傳歸來獨臥逍遙夜
夢裏相逢酩酊天花易落月難圓只應花月似歡緣
秦箏算有心情在試寫離聲入舊絃

又

九日悲秋不到心鳳城歌管有新音風凋碧柳愁眉淡
露染黃花笑靨深初見鴈已聞砧綺羅叢裏勝登臨
須教月戶纖纖玉細捧霞觴灑灑金

又

碧藕花開水殿涼萬年枝外轉紅陽昇平歌管隨天仗
祥瑞封章滿御牀金掌露玉爐香歲華方共聖恩長

皇州又奏圓扉靜十樣宮眉捧壽觴

又

綠橋梢頭幾點春似留香藥送行人明朝紫鳳朝天路
十二重城五碧雲歌漸咽酒初醺儘將紅淚濕湘裙
贛江西畔從今日明月清風憶使君

生查子

金鞭美少年去躍青驄馬牽繫玉樓人繡被春寒夜
消息未歸來寒食梨花謝無處說相思背面鞦韆下

又

輕匀兩臉花淡掃雙眉柳會寫錦牋時學弄朱絃後
今春玉釧寬昨夜羅裙皺無計柰情何日醉金杯酒

又

關山魂夢長魚鴈音塵少兩鬢可憐青只爲相思老
歸夢碧紗窗說與人人道真箇別離難不似相逢好

又

墜雨已辭雲流水難歸浦遺恨幾時休心抵秋蓮苦
忍淚不能歌試託哀絃語絃語願相逢知有相逢否

又

一分殘酒霞兩點愁蛾暈羅幕夜猶寒玉枕春先困
心情翦綵慵時節燒燈近見少別離多還有人堪恨

又

輕輕製舞衣小小裁歌扇三月柳濃時又向津亭見

垂淚送行人濕破紅妝面玉指袖中彈一曲清商怨

又

紅塵陌上游碧柳堤邊住纔趁彩雲來又逐飛花去
深深美酒家曲曲幽香路風月有情時總是相思處

又

長恨涉江遙移近溪頭住閒蕩木蘭舟誤入雙鴛浦
無端輕薄雲暗作廉纖雨翠袖不勝寒欲向荷花語

又

遠山眉黛長細柳腰肢嫋妝罷立春風一笑千金少
歸去鳳城時說與青樓道徧看潁川花不似師師好

又

落梅庭榭香芳草池塘綠春恨最關情日過闌干曲
幾時花裏閒看得花枝足醉後莫思家借取師師宿

又

狂花頃刻香晚蝶纏絲意天與短因緣聚散常容易
傳唱入離聲惱亂雙蛾翠游子不堪聞正是衷腸事

又

官身幾日閒世事何時足君貌不長紅我鬢無重綠
榴花滿瑣香金縷多情曲且盡眼中歡莫歎時光促

又

春從何處歸試向溪邊問岸柳弄嬌黃隴麥回青潤
多情美少年屈指芳菲近誰寄嶺頭梅來報江南信

一

南鄉子

涼水帶青潮水上朱闌小渡橋橋上女兒雙笑靨妖嬈
倚著闌干弄柳條 月夜落花朝減字偷聲按玉簫柳
外行人回首處迢迢若比銀河路更遙

又
小藥受春風日日宮花花樹中恰向柳絲撩亂處相逢
笑靨旁邊心字濃 歸路草茸茸家在秦樓更近東醒
去醉來無限事誰同說著西池滿面紅

又
花落未須悲紅藥明年又滿枝惟有花閒人別後無期
水闊山長鴈字遲 今日最相思記得攀條話別離共

說春來春去事多時一
點愁心入翠眉

又

何處別時難玉指偷將粉淚彈記得來時樓上燭初殘
待得清霜滿畫闌不慣獨眠寒自解羅衣襯枕檀百媚也應愁不睡更闌惱亂心情半被閒

又

畫鴨嬾熏香繡茵猶展舊鴛鴦不似同衾愁易曉空牀
細剔銀燈怨漏長幾夜月波涼夢魂隨月到蘭房殘
睡覺來人又遠難忘更是無情也斷腸

又

眼約也應虛昨夜歸來鳳枕孤且據如今情分裏相於

只恐多時不似初 深意託雙魚小翦蠻牋細字書更
把此情重問得何如共結因緣久遠無

又

新月又如眉長笛誰教月下吹樓倚暮雲初見鴈南飛
漫道行人鴈後歸 意欲夢佳期夢裏關山路不知卻
待短書來破恨應遲還是涼生玉枕時

清平樂

留人不住醉解蘭舟去一棹碧濤春水路過盡曉鶯啼
處 渡頭楊柳青青枝葉葉離情此後錦書休寄畫
樓雲雨無憑

又

千花百草送得春歸了拾藥人稀紅漸少葉底杏青梅
小
小瓊閒抱琵琶雪香微透輕紗正好一枝嬌豔當
筵獨占韶華

又

煙輕雨小紫陌香塵少謝客池塘生綠草一夜紅梅先
老
旋題羅帶新詩重尋楊柳佳期強半春寒去後幾
番花信來時

又

可憐嬌小掌上承恩早把鏡不知人易老欲占朱顏長
好
畫堂秋月佳期藏鉤賭酒歸遲紅燭淚前低語綠

牋花裏新詞

又

紅英落盡未有相逢信可恨流年凋綠鬢睡得春醒欲
醒 鈿箏曾醉西樓朱絃玉指梁州曲罷翠簾高卷幾
回新月如鉤

又

春雲綠處又見歸鴻去側帽風前花滿路冶葉倡條情
緒 紅樓桂酒新開曾攜翠袖同來醉弄影娥池水短
簫吹落殘梅

又

波紋碧皺曲水清明後折得疏梅香滿袖暗喜春紅依
舊 歸來紫陌東頭金釵換酒消愁柳影深深細路花

梢小小層樓

又

西池煙草恨不尋芳早
滿路落花紅不掃春色漸隨人老
遠山眉黛嬌長清歌細逐霞觴正在十洲殘夢水心宮殿斜陽

又

蕙心堪怨也逐春風轉丹杏牆東當日見幽會綠窗題偏
眼中前事分明可憐如夢難憑都把舊時薄倖只消今日無情

又

么絃寫意意密絃聲碎書得鳳牋無限事猶恨春心難

寄臥聽疏雨梧桐雨餘淡月朦朧一夜夢魂何處那
回楊葉樓中

又

笙歌宛轉臺上吳王宴宮女如花倚春殿舞綻縷金衣
線酒闌畫燭低迷彩鶯驚起雙棲月底三千繡戶雲
閒十二瓊梯

又

暫來還去輕似風頭絮縱得相逢留不住何況相逢無
處去時約略黃昏月華卻到朱門別後幾番明月素
娥應是消魂

又

雙紋彩袖笑捧金船酒嬌妙如花輕似柳勸客千春長壽
豔歌更倚疏絃有情須醉尊前恰是可憐時候玉嬌
今夜初圓

又

寒催酒醒曉陌飛霜定背照畫簾殘燭影斜月中人
靜錦衣才子西征萬重雲水初程翠黛倚門相送鸞
腸斷處離聲

又

蓮開欲偏一夜秋聲轉殘綠斷紅香片片長是西風堪
怨莫愁家住溪邊采蓮心事年年誰管水流花謝月
明昨夜蘭船

又

沈思暗記幾許無憑事菊臘開殘秋少味閒卻畫闌風
意夢雲歸處難尋微涼暗入香襟猶恨那回庭院依
前月淺燈深

又

鶯來燕去宋玉牆東路草草幽歡能幾度便有繫人心
處碧天秋月無端別來長照關山一點懨懨誰會依
前凭暖闌干

又

心期休問只有尊前分句引行人添別恨因是語低香
近勸人滿酌金鍾清歌唱徹還重莫道後期無定夢

魂猶有相逢

木蘭花

鞦韆院落重簾暮彩筆閒來題繡戶牆頭丹杏雨餘花
門外綠楊風後絮朝雲信斷知何處應作襄王春夢
去紫骝認得舊游蹤嘶過畫橋東畔路

又

小鬟若解愁春暮一笑留春春也住晚紅初減謝池花
新翠已遮瓊苑路湔裙曲水曾相遇挽斷羅巾容易
去啼珠彈盡又成行畢竟心情無會處

小蓮未解論心素狂似鉏箏絃底柱臉邊霞散酒初醒

眉上月殘人欲去 舊時家近章臺住
盡日東風吹柳絮 生憎繁杏綠陰時
正礙粉牆偷眼覷

又

風簾向曉寒成陣來報東風消息近試從梅蒂紫邊尋
更繞柳枝柔處問 來遲不是春無信開晚卻疑花有
恨 又應添得幾分愁
二十五絃彈未盡

又

念奴初唱離亭宴會作離聲句別怨當時垂淚憶西樓
濕盡羅衣歌未徧 難逢最是身強健無定莫如人聚
散已拚歸袖醉相扶更惱香檀珍重勸

又